

গণপ্রজাতন্ত্রী বাংলাদেশ সরকার
তথ্য মন্ত্রণালয়
চলচ্চিত্র-১ শাখা
বাংলাদেশ সচিবালয়, ঢাকা
www.moi.gov.bd

নং-১৫.০০.০০০০.০২৭.২২.০০৫.১৪. ১৩


তারিখঃ ০২ ফাল্গুন ১৪২৫
১৪ ফেব্রুয়ারি ২০১৯

বিষয়: বাংলাদেশ চলচ্চিত্র উন্নয়ন কর্পোরেশন (সংশোধনী) আইন-২০১৮ এর খসড়ার উপর সর্বসাধারণের মতামত প্রদান।

বাংলাদেশ চলচ্চিত্র উন্নয়ন কর্পোরেশন আইন-১৯৫৭ যুগোপযোগী করে বাংলায় প্রণয়নের লক্ষ্যে “বাংলাদেশ চলচ্চিত্র উন্নয়ন কর্পোরেশন (সংশোধন) আইন, ২০১৮” এর খসড়া প্রস্তুত করা হয়েছে। উক্ত খসড়া তথ্য মন্ত্রণালয়ের ওয়েব সাইটে প্রকাশ করা হয়েছে। প্রকাশিত খসড়া আইনের উপর আগামী ১৫ দিনের মধ্যে নিম্নস্বাক্ষরকারী বরাবরে লিখিত/ই-মেইলের মাধ্যমে মতামত (নিকশ ফন্টে) প্রেরণের জন্য সর্বসাধারণকে নির্দেশক্রমে অনুরোধ করা যাচ্ছে।

ই-মেইল ঠিকানা: sas.film@moi.gov.bd

সংযুক্তি: বাংলাদেশ চলচ্চিত্র উন্নয়ন কর্পোরেশন (সংশোধনী) আইন-২০১৮ এর খসড়া।


(মোঃ সাইফুল ইসলাম)
উপসচিব (চলচ্চিত্র)
ফোন- ৯৫৪০৪৬৩
E-mail : sas.film@moi.gov.bd

অনুলিপি:

১. জনাব মো: মাহবুবুল কবীর সিদ্দিকী, সিস্টেম এনালিস্ট, তথ্য মন্ত্রণালয়, বাংলাদেশ সচিবালয়, ঢাকা (তাকে আগামী ০৩ মার্চ ২০১৯ তারিখ পর্যন্ত খসড়া আইন ওয়েব সাইটে প্রকাশের ব্যবস্থা গ্রহণের জন্য অনুরোধ করা হলো)।
২. অতিরিক্ত সচিব (প্রশাসন ও চলচ্চিত্র) মহোদয়ের ব্যক্তিগত কর্মকর্তা, তথ্য মন্ত্রণালয়, বাংলাদেশ সচিবালয়, ঢাকা (অতিরিক্ত সচিব মহোদয়ের সদয় অবগতির জন্য)।
৩. যুগ্মসচিব (প্রশাসন ও চলচ্চিত্র) মহোদয়ের ব্যক্তিগত কর্মকর্তা, তথ্য মন্ত্রণালয়, বাংলাদেশ সচিবালয়, ঢাকা (যুগ্মসচিব মহোদয়ের সদয় অবগতির জন্য)।

বাংলাদেশ চলচ্চিত্র উন্নয়ন কর্পোরেশন (সংশোধনী) আইন, ২০১৮

যেহেতু বাংলাদেশ চলচ্চিত্র উন্নয়ন কর্পোরেশনের অগ্রগতি সাধনের উদ্দেশ্যে বাংলাদেশ চলচ্চিত্র উন্নয়ন কর্পোরেশন আইন-১৯৫৭ এর অধিকতর সংশোধনী ও যুগপোযোগী করা সমীচীন এবং প্রয়োজনীয় সেহেতু এতদ্বারা নিম্নরূপ আইন করা হলো :

এতদ্বারা নিম্নরূপ আইন প্রণয়ন করা হইল—

১। সংক্ষিপ্ত শিরোনাম ও প্রবর্তন—

- (১) এই আইন বাংলাদেশ চলচ্চিত্র উন্নয়ন কর্পোরেশন (সংশোধনী) আইন, ২০১৮ নামে অভিহিত হইবে।
- (২) ইহা সমগ্র বাংলাদেশে কার্যকরী হইবে।
- (৩) সরকার অফিসিয়াল গেজেট বিজ্ঞপ্তির মাধ্যমে যে তারিখ নির্ধারণ করিবে সেই দিন হইতে ইহা কার্যকরী হইবে।

২। সংজ্ঞা—

বিষয় ও প্রসঙ্গের পরিপন্থী কিছু না থাকিলে, এই আইনে—

- (ক) “বোর্ড” বলিতে কর্পোরেশনের পরিচালনা বোর্ডকে বুঝাইবে।
- (খ) “সেবা গ্রহীতা” বলিতে কোন ব্যক্তি বা ব্যক্তিবর্গ অথবা ব্যক্তিবর্গের প্রতিষ্ঠান, বিধিবদ্ধ হউক বা না হউক, যাহাকে এই আইনের আওতায় কর্পোরেশন সেবা প্রদান করিয়াছে এবং এই ধরনের ব্যক্তি বা ব্যক্তিবর্গের উত্তরাধিকারী এবং দায়িত্বপ্রাপ্তগণ।
- (গ) “কর্পোরেশন” বলিতে আইন দ্বারা প্রতিষ্ঠিত বাংলাদেশ চলচ্চিত্র উন্নয়ন কর্পোরেশনকে বুঝাইবে।
- (ঘ) “চলচ্চিত্র শিল্প” বলিতে একটি শিল্পকে বুঝায় যাহা বাণিজ্যিক কিংবা অবাণিজ্যিকভাবে প্রদর্শনের জন্য চলমান চলচ্চিত্র উৎপাদনে নিয়োজিত রহিয়াছে সেই সমস্ত প্রতিষ্ঠানসহ চলচ্চিত্র প্রযোজনার জন্য স্টুডিও স্থাপন এবং উহার রক্ষণাবেক্ষণও অন্তর্ভুক্ত হইবে।
- (ঙ) “ফিল্ম” বলিতে সেলুলয়েড কিংবা ডিজিটাল ফিল্মকে বুঝাইবে যাহা বাণিজ্যিকভাবে কিংবা অবাণিজ্যিকভাবে প্রদর্শনের নিমিত্তে চলমান ছবি উৎপাদনে ব্যবহৃত হইয়া থাকে।
- (চ) “তফসিলী ব্যাংক” বলিতে বাংলাদেশ ব্যাংক কর্তৃক সময়ে সময়ে তালিকাভুক্ত ব্যাংককে বুঝাইবে।
- (ছ) “কেন্দ্রীয় ব্যাংক” বলিতে বাংলাদেশ ব্যাংককে বুঝাইবে।

৩। কর্পোরেশনের প্রতিষ্ঠা ও বিধিবদ্ধতা—

- (১) এই আইনের উদ্দেশ্য পূরণকল্পে পূর্ব পাকিস্তান চলচ্চিত্র উন্নয়ন কর্পোরেশন আইন, ১৯৫৭ এর অধীন প্রতিষ্ঠিত “বাংলাদেশ চলচ্চিত্র উন্নয়ন কর্পোরেশন” এমনভাবে বহাল থাকিবে যেন উহা এই আইনের অধীন প্রতিষ্ঠিত হইয়াছে।
- (২) কর্পোরেশন হিসেবে বাংলাদেশ চলচ্চিত্র উন্নয়ন কর্পোরেশন নামে একটি সংবিধিবদ্ধ সংস্থা হইবে এবং ইহার স্থায়ী ধারাবাহিকতা ও একটি সাধারণ সীল মোহর থাকিবে, এই আইন ও বিধি সাপেক্ষে, ইহার স্থাবর ও অস্থাবর উভয় প্রকার সম্পত্তি অর্জন করা, অধিকারে রাখা ও হস্তান্তর করার ক্ষমতা থাকিবে এবং এই নামে কর্পোরেশন অন্যদের নামে মামলা দায়ের করিতে পারিবে বা অন্যরা ইহার বিরুদ্ধে মামলা দায়ের করিতে পারিবে।

৪। শেয়ার মূলধন ও শেয়ারধারীগণ—

- (১) (ক) কর্পোরেশনের অনুমোদিত মূলধনের পরিমাণ অন্ত্যন ১০০০ (এক হাজার) কোটি টাকা, যাহা প্রতিটি ১০ (দশ) টাকা অভিহিত মূল্যের ১০০ (একশত) কোটি সাধারণ শেয়ারে বিভক্ত হইবে। সরকারের পূর্ব অনুমতি

সাপেক্ষে কর্পোরেশন বিভিন্ন সময়ে এই সকল শেয়ার ছাড়িতে (Issued) এবং বরাদ্দ (alloted) করিতে পারিবে।

(খ) কর্পোরেশনের পরিশোধিত মূলধনের পরিমাণ হইবে ন্যূনতম ৩৫০ (তিনশত পঁঞ্চাশ) কোটি টাকা যাহা ৩৫ (পঁয়ত্রিশ) কোটি সাধারণ শেয়ারে বিভক্ত হইবে, যাহা শেয়ার বিভক্তি বিধি দ্বারা নির্ধারিত হইবে

(২) সরকারের পূর্বানুমোদন ক্রমে কর্পোরেশন সময়ে সময়ে অনুমোদিত মূলধন (authorised capital) বৃদ্ধি করিতে পারিবে।

(৩) সরকার কর্পোরেশনের একজন শেয়ারধারী থাকিবেন এবং কর্পোরেশন কর্তৃক যে কোন সময়ে ইস্যু করা শেয়ারের মধ্যে সরকার গ্রাহক হিসেবে শতকরা ৫১ ভাগ এর কম হইবে না এই পরিমাণ শেয়ার ক্রয় করিবে এবং শেয়ার ধরিয়া রাখিবে, অবশিষ্ট শেয়ার জনসাধারণের ক্রয়ের জন্য সংরক্ষিত থাকিবে।

৫। অনুমোদিত জামানত -

কর্পোরেশনের শেয়ার ও ঋণপত্র (ডিবেঞ্চার) ট্রাস্ট আইন, ১৮৮২ এর আওতায় অনুমোদিত জামানত (approved securities) হিসাবে গণ্য হইবে (II-1882)।

৬। ব্যবস্থাপনা-

(১) কর্পোরেশনের সাধারণ পরিচালনা এবং প্রশাসনসহ সকল বিষয়াদি একটি পরিচালনা বোর্ডের (Board of Directors) উপর ন্যস্ত থাকিবে। পরিচালনা বোর্ড কার্যনির্বাহী কমিটি ও ব্যবস্থাপনা পরিচালকের সহায়তায় সকল ক্ষমতার প্রয়োগসহ যাবতীয় কার্যাবলি ও বিষয়াদি সম্পাদন করিবেন, যাহা কর্পোরেশন কর্তৃক প্রয়োগ বা করা যাইত।

(২) পরিচালনা বোর্ড ইহার দায়িত্ব পালনকালে বাণিজ্যিক, অবাণিজ্যিক ও শিল্প বিবেচনায় কার্যাদি করিবে এবং সরকার কর্তৃক সময়ে সময়ে যে সকল নীতিমালা নির্দেশিত হইবে তাহা অনুসরণ করিবে, সকল নীতিমালা নির্ধারণের ক্ষেত্রে সরকার চূড়ান্ত কর্তৃপক্ষ হিসাবে গণ্য হইবে।

(৩) যদি বোর্ড সরকার কর্তৃক উপরিউক্ত নির্দেশিত কোন আদেশ বাস্তবায়নে ব্যর্থ হয় তাহলে সরকার উহার কারণ লিপিবদ্ধ করিয়া ৭(খ) ধারায় নির্বাচিত পরিচালকগণ ছাড়া অন্য পরিচালকগণসহ চেয়ারম্যানকে অপসারণ করিতে পারে এবং ৭ ধারায় যাহা কিছুই থাকুক না কেন, নতুন বোর্ড গঠিত না হওয়া পর্যন্ত উক্ত ধারার বিধান এর সহিত সামঞ্জস্যতা রেখে তাহাদের স্থলে অস্থায়ী ভিত্তিতে পরিচালক হিসেবে অস্থায়ী নিয়োগ করা যাইতে পারে।

৭। পরিচালনা বোর্ড-

(ক) কর্পোরেশনের পরিচালনা বোর্ডের সদস্য সংখ্যা হইবে ন্যূনতম ৯(নয়) জন, তবে ১৩(তের) জনের অধিক হইবে না। কর্পোরেশনের পরিচালনা বোর্ড এর গঠন নিম্নরূপ :-

১. সচিব, তথ্য মন্ত্রণালয়	: চেয়ারম্যান
২. অতিরিক্ত/যুগ্মসচিব, তথ্য মন্ত্রণালয়	: সদস্য
৩. অতিরিক্ত/যুগ্মসচিব, অর্থ বিভাগ, অর্থ মন্ত্রণালয়	: সদস্য
৪. অতিরিক্ত/যুগ্মসচিব, আইন ও বিচার বিভাগ	: সদস্য
৫. অতিরিক্ত/যুগ্মসচিব, বাণিজ্য মন্ত্রণালয়	: সদস্য
৬. ব্যবস্থাপনা পরিচালক, বিএফডিসি	: সদস্য
৭. অতিরিক্ত/যুগ্মসচিব, সংস্কৃতি বিষয়ক মন্ত্রণালয়	: সদস্য
৮. মহাপরিচালক, পররাষ্ট্র মন্ত্রণালয়	: সদস্য
৯. সভাপতি, বাংলাদেশ চলচ্চিত্র প্রযোজক পরিবেশক সমিতি	: সদস্য

(খ) শেয়ার হোল্ডারদের দ্বারা নির্ধারিত পদ্ধতিতে ৩জন পরিচালক নির্বাচিত হইবেন।

(গ) সরকার দ্বারা ব্যবস্থাপনা পরিচালক নিয়োজিত হইবেন ধারা-৯ অনুযায়ী।

(ঘ) কর্পোরেশনের পরিচালক (প্রশাসন ও অর্থ) পরিচালনা বোর্ডের সাচিবিক দায়িত্ব পালন করবেন।

৮। পরিচালকগণের মেয়াদকাল-

(১) সরকার কর্তৃক নিয়োগকৃত পরিচালকগণ সরকারের সন্তুষ্টিকাল পর্যন্ত পদে বহাল থাকিবেন।

(২) একজন নির্বাচিত পরিচালক তিন বছর তাহার পদে অধিষ্ঠিত থাকিবেন, তাহার কার্যকালের মেয়াদ শেষ হওয়ার পর উত্তরাধিকারী নির্বাচিত না হওয়া পর্যন্ত তিনি দায়িত্ব চালাইয়া যাইবেন এবং তিনি পুনঃনির্বাচনের যোগ্য হইবেন।

(৩) পরিচালক পদে সাময়িক সৃষ্ট শূন্যতা নির্বাচন বা নিয়োগ যে ভাবে প্রযোজ্য হয়, সে ভাবে পূরণ করা যাইতে পারে এবং শূন্য পদ পূরণের জন্য নির্বাচিত বা নিয়োগকৃত পরিচালক তাহার পূর্বগামী পরিচালকের অসমাপ্ত মেয়াদ পর্যন্ত দায়িত্ব পালন করিবেন। তবে শর্ত থাকে যে, যদি মেয়াদকালের শেষ তিন মাসের মধ্যে কোন পদে সাময়িক শূন্যতার সৃষ্টি হয় তাহা হইলে উহা পূরণ করার প্রয়োজন হইবে না।

(৪) বোর্ডের কোন কাজ বা কার্যবিধি কেবল কোন পদের শূন্যতা বা বোর্ড গঠনের কোন ত্রুটি জনিত কারণে অবৈধ হইবে না।

৯। ব্যবস্থাপনা পরিচালক—

সরকার কর্তৃক কর্পোরেশনের ব্যবস্থাপনা পরিচালক পদে নিয়োগদান করা হইবে এবং তিনি

(ক) কর্পোরেশনের সার্বক্ষণিক কাজে নিয়োজিত একজন কর্মকর্তা হইবেন,

(খ) বোর্ড কর্তৃক প্রবিধান দ্বারা তাহার উপর অর্পিত দায়িত্ব পালন করিবেন।

(গ) তিনি অন্য কোন কর্পোরেশন, কোম্পানি বা প্রতিষ্ঠানে পরিচালক পদ গ্রহণ হইতে বিরত থাকিবেন।

(ঘ) সরকার কর্তৃক অপসারিত না হইলে তিনি ৩(তিন) বছর পদে বহাল থাকিবেন, এবং এক বা একাধিক মেয়াদে পুনঃ নিয়োগের জন্য উপযুক্ত বিবেচিত হইবেন। তবে শর্ত থাকে যে, এই ধরনের অতিরিক্ত মেয়াদকাল তিন বছরের অধিক হইবে না যাহা সরকার কর্তৃক নির্ধারণ করা হইবে এবং

(ঙ) সরকার যেরূপ নির্ধারণ করণে তদ্রূপ বেতন ও ভাতা প্রাপ্য হইবেন।

১০। নির্বাহী কমিটির গঠন ও ক্ষমতা—

(১) তিন সদস্য সমন্বয়ে কার্যনির্বাহী কমিটি গঠিত হইবে অর্থাৎ ব্যবস্থাপনা পরিচালক (যিনি কমিটির চেয়ারম্যান হইবেন), নিয়োগকৃত পরিচালকদের মধ্যে হইতে সরকার কর্তৃক নিয়োগপ্রাপ্ত একজন পরিচালক এবং সরকার ব্যতীত কর্পোরেশনের শেয়ার হোল্ডারগণ কর্তৃক নির্ধারিত প্রক্রিয়ায় নির্বাচিত পরিচালকদের মধ্যে হইতে একজন পরিচালক তবে শর্ত থাকে যে,

(ক) যদি কোন সময় একজন মাত্র নির্বাচিত পরিচালক থাকেন তবে তাহাকে নির্বাচিত সদস্য হিসাবে গণ্য করা হইবে।

(খ) যদি কোন সময়ে নির্বাচিত কোন পরিচালক না থাকেন, তবে এইরূপ পরিচালক নির্বাচিত না হওয়া পর্যন্ত নির্বাচিত পরিচালকের জন্য সংরক্ষিত সদস্য পদে সরকার কর্তৃক নিয়োগকৃত পরিচালকদের মধ্যে হইতে একজন পরিচালক নিয়োগ করবে।

(২) একজন নির্বাচিত সদস্য তিন বছর পদে বহাল থাকিবেন এবং পুনঃ নির্বাচনের জন্য যোগ্য হইবেন; কিন্তু তিনি উক্ত পদে বহাল থাকিবেন না যখন নির্বাচিত পরিচালক হিসেবে তাহার মেয়াদের অবসান হয়।

(৩) বোর্ড কর্তৃক বিভিন্ন সময়ে প্রদত্ত সাধারণ বা বিশেষ নির্দেশাবলি সাপেক্ষে নির্বাহী কমিটি বোর্ডের অনুরূপ ক্ষমতায় যে কোন কার্যাদি করিতে ক্ষমতাপ্রাপ্ত হইবে।

(৪) নির্বাহী কমিটির প্রত্যেক সভার কার্যবিবরণী পরবর্তী বোর্ড সভার সম্মুখে উপস্থাপন করিতে হইবে।

১১। পরিচালক পদের অযোগ্যতা—

কোন ব্যক্তি পরিচালক হইবেন না বা পরিচালক হিসাবে কর্মরত থাকিবে না, যিনি—

(ক) ব্যবস্থাপনা পরিচালক ব্যতীত কর্পোরেশনের বেতনভুক্ত কর্মকর্তা হন, অথবা

(খ) দেউলিয়া হন বা আদালত কর্তৃক কোন সময় দেউলিয়া ঘোষণা করা হয়, অথবা

(গ) পাগল বা মানসিকভাবে অপ্রকৃতিস্থ হন, অথবা,

(ঘ) ফৌজদারী অপরাধের জন্য দণ্ডপ্রাপ্ত হন বা কোন অপরাধের জন্য দণ্ডপ্রাপ্ত হন যাহা সরকারের মতে নৈতিক স্বলনজনিত অপরাধের পর্যায়ভুক্ত হয়, অথবা

(ঙ) অপ্রাপ্ত বয়স্ক।

